

Молебное пение во время губительного поветрия и
смертоносной заразы
(мирянский чин)

Богослужбное пособие

*Оформление и подготовка текста:
диакон Алексей Попов*

Москва

2020

Оглавление

Молебное пение во время губительного поветрия и смертоносной заразы (полный чин).....	3
Молебное пение во время губительного поветрия и смертоносной заразы (краткий чин).....	15

Молебное пение во время губительного поветрия и смертоносной заразы (полный чин)

Старший: Молитвами святых отец наших, Господи Иисусе Христе, Боже наш, помилуй нас.

Лик: Аминь.

Старший: Слава Тебе, Боже наш, слава Тебе.

Лик и все, кто присутствует: Царю Небесный,/ Утешителю, Душе истины,/ Иже везде сый/ и вся исполняяй,/ Сокровище благих/ и жизни Подателю,/ прииди и вселися в ны,/ и очисти ны от всякия скверны,// и спаси, Блаже, души наша.

Чтец: Трисвятое по Отче наш.

Старший: Молитвами святых отец наших...

Чтец: Аминь. Господи, помилуй (12 раз). Слава, и ныне. Приидите, поклонимся...

Псалом 37

Господи, да не яростию Твоею обличиши мене, ниже гневом Твоим накажеши мене. Яко стрелы Твоя унзоша во мне, и утвердил еси на мне руку Твою. Несть исцеления в плоти моей от лица гнева Твоего, несть мира в костях моих от лица грех моих. Яко беззакония моя превзыдоша главу мою, яко бремя тяжкое отяготеша на мне. Возмердеша и согниша раны моя от лица безумия моего. Пострадах и слякохся до конца, весь день сетуя хождах. Яко лядвия моя наполнишася поруганий, и несть исцеления в плоти моей. Озлоблен бых и смирихся до зела, рыках от въздыхания сердца моего. Господи, пред Тобою все желание мое, и въздыхание мое от Тебе не утаися. Сердце мое смятеся, остави мя сила моя, и свет очию моею, и той несть со мною. Друзи мои и искреннии мои прямо мне приближишася, и сташа. И ближнии мои отдалече мене сташа, и нуждахуся ищущии душу мою: и ищущии злая мне глаголаху суетная, и льстивным весь день поучахуся. Аз же яко глух не слышах, и яко нем не отверзаяй уст своих, И бых яко человек не слышай, и не имый во устех своих обличения. Яко на Тя, Господи, уповах, Ты услышиши, Господи Боже

мой. Яко рех: да не когда порадуют ми ся врази мои: и внегда подвижатися ногам моим, на мя велеречеваша. Яко аз на раны готов, и болезнь моя предо мною есть выну. Яко беззаконие мое аз возвещу, и попекуся о гресе моем. Врази же мои живут, и укрепишася паче мене, и умножишася ненавидящие мя без правды. Воздающие ми злая воз благая оболгаху мя, зане гонях благостыню. Не остави мене, Господи Боже мой, не отступи от мене. Вонми в помощь мою, Господи спасения моего.

[Вместо данного богослужебного текста возможно чтение псалма 90:

Живый в помощи Вышняго, в крове Бога Небеснаго водворится, речет Господеву: Заступник мой еси и Прибежище мое, Бог мой, и уповаю на Него. Яко Той избавит тя от сети ловчи и от словесе мятежна: Плещма Своима осенит тя, и под криле Его надеешися: оружием обыдет тя истина Его. Не убоишися от страха нощнаго, от стрелы летящая во дни, от вещи во тьме преходящая, от сряща и беса полуденнаго. Падет от страны твоя тысяща, и тьма одесную тебе, к тебе же не приблизится: Обаче очима твоима смотриши, и воздаяние грешников узриши. Яко Ты, Господи, упование мое: Вышняго положил еси прибежище твое. Не приидет к тебе зло, и рана не приблизится телеси твоему: Яко Ангелом Своим заповесть о тебе, сохранити тя во всех путех твоих. На руках возмут тя, да не когда преткнеши о камень ногу твою: На аспида и василиска наступиши, и попереши льва и змия. Яко на Мя упова и избавлю и: покрыю и, яко позна имя Мое. Воззовет ко Мне, и услышу его: с ним есмь в скорби, изму его, и прославлю его: Долготою дней исполню его и явлю ему спасение Мое.]

Слава, и ныне. Аллилуиа, аллилуиа, аллилуиа, слава Тебе, Боже (трижды).

Лик: Господи, помилуй (12 раз).

Старший: Молитвами святых отец наших...

Лик: Аминь.

Старший: Бог Господь, и явился нам, благословен грядый во имя Господне.

(Стих 1:) Исповедайтесь Господеви, яко Благ, яко во веки милость Его.

Лик: Бог Господь... *(на второй глас)*

Стих 2: Обышедше обыдоша мя, и именем Господним противляхся им.

Лик: Бог Господь...

Стих 3: Не умру, но жив буду, и повем дела Господня.

Лик: Бог Господь...

Стих 4: Камень, егоже небрегоша зиждущии, сей бысть во главу угла: от Господа бысть сей, и есть дивен во очесех наших.

Лик: Бог Господь...

Тропарь, глас 2:

Во гневе Твоем, Боже, помяни щедроты Твоя,/ прах бо и пепел есмы,/ дух ходяй и не обращайся/, и не яростию Твоею обличи нас,/ да не погибнем до конца,/ но пощади души наша,// яко един Милосерд **(Дважды)**.

Слава, и ныне; Богородичен, глас 4:

Заступнице усердная,/ Мати Господа Вышняго,/ за всех молиши Сына Твоего Христа Бога нашего,/ и всем твориши спастися,/ в державный Твой покров прибегающим./ Всех нас заступи, о Госпоже Царице и Владычице,/ иже в напастех и в скорбех и в болезнях обремененных грехи многими,/ предстоящих и молящихся Тебе умиленною душею/ и сокрушенным сердцем/ пред Пречистым Твоим образом со слезами,/ и невозвратно надежду имущих на Тя,/ избавления всех зол,/ всем полезная даруй/ и вся спаси, Богородице Дево:// Ты бо еси Божественный покров рабом Твоим.

Чтец читает псалом 50:

Помилуй мя, Боже, по велицей милости Твоей, и по множеству щедрот Твоих очисти беззаконие мое. Наипаче омой мя от беззакония моего, и от греха моего очисти мя. Яко беззаконие мое аз знаю, и грех мой предо мною есть выну. Тебе Единому согреших, и лукавое пред Тобою сотворих: яко да оправдишися во словесех Твоих, и победиши, внегда судити Ти. Се бо в беззакониих зачат есмь, и во гресех роди мя мати моя. Се бо истину возлюбил

еси, безвестная и тайная премудрости Твоя явил ми еси. Окропиши мя иссопом, и очищуся: омыеши мя, и паче снега убелюся. Слуху моему даси радость и веселие: возрадуются кости смиренныя. Отврати лице Твое от грех моих, и вся беззакония моя очисти. Сердце чисто созижди во мне, Боже, и дух прав обнови во утробе моей. Не отвержи мене от лица Твоего, и Духа Твоего Святаго не отыми от мене. Воздаждь ми радость спасения Твоего, и Духом Владычним утверди мя. Научу беззаконные путем твоим, и нечестивые к Тебе обратятся. Избави мя от кровей, Боже, Боже спасения моего: возрадуется язык мой правде Твоей. Господи, устне мои отверзеши, и уста моя возвестят хвалу Твою. Яко аще бы восхотел еси жертвы, дал бых убо: всесожжения не благоволиши. Жертва Богу дух сокрушен: сердце сокрушенно и смиренно Бог не уничижит. Ублажи, Господи, благоволением Твоим Сиона, и да созиждутся стены Иерусалимские. Тогда благоволиши жертвы правды, возношение и всесожегаемая: тогда возложат на олтарь Твой тельцы.

Канон ко Пресвятой Троице, глас 8.

Песнь 1.

Ирмос: Колесницегонителя фараона погрузи,/ чудотворяй иногда/
Моисейский жезл, крестообразно поразив,/ и разделив море, Израиля же
беглеца, пешеходца спасе,// песнь Богови воспевающа.

Припев: Пресвятая Троице, Боже наш, слава Тебе.

Вседетельная, и Срасленая, и Сопрестольная, и Единосильная, и
Трисветлая Славо, Отче Непостижимо, Сыне и Душе Святой, лютыя болезни
рабы Твоя свободи, яко да благодарственно Тя славим.

Припев: Пресвятая Троице, Боже наш, слава Тебе.

Грехов буря изрину мя в глубину немощи, и частыя болезни, якоже
треволнение мя обуревают окаяннаго: Единосильная Державо, Троице Святая,
умилосердися, и спаси мя люте погибающа.

Слава: О содержащаго греза избави, Троице нераздельная, нас Твоя рабы, росую милости Твоя угашаючи зной лютых моих болезней, и здравие подаючи, яко да православно воспевает Тя.

И ныне: Избавителя и Вседетеля и Господа во чреве носившая, наша недуги, Всечистая, понесшаго: Того убо моли лютя немощи Твоя рабы избавити, едина человек Помоще.

Песнь 3.

Ирмос: Небеснаго круга/ Верхотворче Господи,/ и Церкви Зиждителю,/ Ты мене утверди в любви Твоей,/ желаний краю, верных утверждение,// Едине Человеколюбче.

Припев: Пресвятая Троице, Боже наш, слава Тебе.

Небеснии умове, ангельския чины, Престоли, и Начала, и Силы, и Господства, молят Тя, Благаго и Спаса: губительнаго свободи недуга рабы Твоя.

Припев: Пресвятая Троице, Боже наш, слава Тебе.

Да човеколюбия на мнозе, Владыко, Твоего покажеш бездну, Всесильне, недуга свободи смертоноснаго, и болезней лютых рабы Твоя, Едине Долготерпеливе.

Слава: Яко Божии предстоятели, служебнии дуси, Ангелы и Архангелы, Сего молите, утолити недуг, разорити печаль, смертоносныя же части избавити.

И ныне: Исцелений источника Тя благих показа, бездна из Тебе прошедшая, Христос Господь, Отроковице Пренепорочная, темже рабы Твоя избави, немощи бурею потопляемых.

Лик поет вместо катавасии, глас 6:

Избави от бед рабы Твоя, Многомилостиве,/ яко мы усердно к Тебе прибегаем,// к милостивому Избавителю, всех Владыце, в Троице славимому Богу.

Седален, глас 2:

Не отрини до конца,/ согрешшия люди Твоя, Владыко,/ ниже остави милости и щедроты Твоя о нас,/ но яко бездна сый щедрот/ и милосердия пучина,/ прими мольбы наша,/ и избави нас от належащая беды и нужды,// Един бо еси благоуветливый.

Песнь 4.

Ирмос: Ты моя крепость, Господи,/ Ты моя и сила,/ Ты мой Бог, Ты мое радование,/ не оставль недра Отча/ и нашу нищету посетив./ Тем с пророком Аввакумом зову Ти:// силе Твоей слава, Человеколюбче.

Припев: Пресвятая Троице, Боже наш, слава Тебе.

Ныне сень воистинну смертная обыде, и ко адовым вратом приближи, но Ты, Спасе, яко силен, нас возставивый, удиви милости Твоя, спасаяй в вере несумненной вопиющих: силе Твоей слава, Человеколюбче.

Припев: Пресвятая Троице, Боже наш, слава Тебе.

Христовы таинницы, самовидцы и проповедницы, приемшии дар исцеления, и врачеве суще душевнии, о нужде мя, Апостоли, изведите содержащаго недуга, Иисуса моляще Владыку, и Избавителя, и Господа.

Слава: Грехов буря ныне нас постиже, немощи волны обуревают, болезни погружают частыя: скорби бо и болезни нас окаянных обретоша. Апостоли Господни, вашими мольбами, помощи руку подайте.

И ныне: Болезньми лютыми и частыми ударяеми, Дево, вси Тебе припадаем: державным покровом Твоим, Чистая, спаси нас всех, ущедри, Богоневестная, избави мора, и лютыя немощи, и болезни исцели, Владычице.

Песнь 5.

Ирмос: Вскую мя отринул еси/ от лица Твоего, Свете Незаходимый,/ и покрыла мя есть чуждая тьма, окаяннаго,/ но обрати мя, и к свету заповедей Твоих// пути моя направи, молюся.

Припев: Пресвятая Троице, Боже наш, слава Тебе.

Моря прелести, медоточными вашими моленьми, священнии пророцы потопивше, ныне преложите горесть всю губительныя нынешния немощи, на божественную благомощия сладость.

Припев: Пресвятая Троице, Боже наш, слава Тебе.

Пронзени быхом стрелами немощи, повелением Твоим, Господи, и утвердися на нас рука Твоя, Всесильне: яко Бог Щедрый, ущедрив всех Твоею милостию, молитвами святых мучеников Твоих.

Слава: Сына якоже древле сына вдовича возставил еси, Твоим повелением, умерщвлена, Слове, лютыя немощи рабы Твоя, яко един Благ и Милостив, избавивый, оживотвори, едине Человеколюбче.

И ныне: В нощи житейстей буря постиже всякаго озлобления, покрыло мя, Дево, немощи омрачение, но возсияй ми прохладения, Пречистая, свет, и к свету благомощия настави.

Песнь 6.

Ирмос: Очисти мя, Спасе,/ многа бо беззакония моя,/ и из глубины зол возведи, молюся:/ к Тебе бо возопих, и услыши мя,// Боже спасения моего.

Припев: Пресвятая Троице, Боже наш, слава Тебе.

В пучине пропасти и немощей облежим, губительныя напасти обуревают волны, Правителю Господи, помощи руку простер ныне, спаси.

Припев: Пресвятая Троице, Боже наш, слава Тебе.

Расслабленнаго якоже древле стягнул еси, Божественным манием от недуга болезненнаго, и одра озлобления, и от недуга тяжчайшаго, ущедрив даждь здравие, Многомилостиве.

Слава: Пророческий лик, Апостолов собрание, полк страдальцев ныне молит Тя, едине Многомилостиве, о людех Твоих, Блаже, сих ущедрив.

И ныне: Марие, чистое девства Сокровище, Ты очисти нас, и недугов, и скорбей, и содержащая ныне немощи избави, да верою Тя прославим.

Лик поет вместо катавасии, глас 6:

Избави от бед рабы Твоя, Многомилостиве,/ яко мы усердно к Тебе прибегаем,// к милостивому Избавителю, всех Владыце, в Троице славимому Богу.

Кондак, глас 6:

Болезни адовы обыдоша нас,/ и прикры ны сень смертная,/ и яко воск от огня,/ дние наши тают от лица гнева Твоего, Господи,/ но яко Щедр во гневе милости помяни,/ и пощади люди Твоя,/ да живи суще,/ в покаянии славим Тя// Единого Человеколюбца.

Чтец: Прокимен, глас 4: Господи, да не яростию Твоею обличиши мене, ниже гневом Твоим накажеш мене.

Лик: Господи, да не яростию Твоею обличиши мене, ниже гневом Твоим накажеш мене.

Чтец (стих): Яко стрелы Твоя унзоша во мне, и утвердил еси на мне руку Твою.

Лик: Господи, да не яростию Твоею обличиши мене, ниже гневом Твоим накажеш мене.

Чтец: Господи, да не яростию Твоею обличиши мене.

Лик: Ниже гневом Твоим накажеш мене.

Чтец: Ко Евреем послания святого апостола Павла чтение.

Братие, егоже любит Господь, наказует: биет же всякаго сына, егоже приемлет. Аще наказание терпите, якоже сыновом обретается вам Бог. Который бо есть сын, егоже не наказует отец; Аще же без наказания есте, емуже причастницы быша вси, убо прелюбодейчици есте, а не сынове. К сим, плоти нашей отца имехом наказатели, и срамляхомся: не много ли паче повинемся Отцу духовом, и живи будем; Они бо в мало дней, якоже годѣ им бе, наказоваху нас, а Сей на пользу, да причастимся святыни Его. Всякое бо наказание в настоящее время не мнится радость быти, но печаль: последи же плод мирен наученным тем воздает правды. Темже ослабленныя руки, и

ослабленная колена исправите. И стези правы сотворите ногами вашими: да не хромое совратится, но паче да исцелее (Зачало 331 от полу).

Аллилуиа, Аллилуиа, Аллилуиа.

Лик: Аллилуиа, Аллилуиа, Аллилуиа.

Чтец (стих 1): Одержаша мя болезни смертныя, и потоцы беззакония смятоша мя.

Лик: Аллилуиа, Аллилуиа, Аллилуиа.

Чтец (стих 2): Болезни адовы обыдоша мя, предвариша мя сети смертныя.

Лик: Аллилуиа, Аллилуиа, Аллилуиа.

Старший: От Луки Святаго Евангелия чтение.

Лик: Слава Тебе, Господи, слава Тебе.

Старший: Во время оно, вниде Иисус в дом Симонов, теща же Симонова бе одержима огнем велиим, и молиша Его о ней. И став над нею, запрети огню, и остави ю: абие же воставши служаше им. Заходящу же солнцу, вси елицы имеяху болящия недуги различными, привождяху их к Нему: Он же на едином коегождо их руце возлож, исцеляше их. Исхождаху же и беси от многих, вопиюще и глаголюще: яко Ты еси Христос Сын Божий. И запрещая не даяше им глаголати, яко ведяху Христа Самого суща. Бывшу же дни изшед иде в пусто место: и народи искаху Его, и приидоша до Него, и держяхуся Его, да не бы отшел от них. Он же рече к ним: яко и другим градовом благовестити Ми подобает Царствие Божие, яко на се послан есмь. И бе проповедавая на сонмищах Галилейских (Зачало 16).

Лик: Слава Тебе, Господи, слава Тебе.

Господи, помилуй (12 раз).

Старший: Молитвами святых отец наших...

Лик: Аминь.

Песнь 7.

Ирмос: Божия снисхождения/ огонь устыдися в Вавилоне иногда,/ сего ради отроцы в печи, радованною ногою,/ яко во цветнице,/ ликующе пояху:// благословен еси, Боже отец наших.

Припев: Пресвятая Троице, Боже наш, слава Тебе.

Опаляет печь безмерных болезней, и сжигает мя огневицы губительныя пламень непрестанно безстуднейший, но рососою милости Твоя, Спасе, прохлади поюща: благословен Бог отец наших.

Припев: Пресвятая Троице, Боже наш, слава Тебе.

Пророцы, Апостоли, мучеников собори, божественнии учителя, болезни недугующих нас мольбами укротите, и здравие даруйте поющим: благословен Бог отец наших.

Слава: Словом Лазаря воскресивый, ныне яко из гроба нас лютыя немощи возставивый, оживи, Господи, да вопием песнь благодарственную: благословен Бог отец наших.

И ныне: Щедре сущая, и Мати Всещедраго, ущедривши избави Твоя люди, призывающия милости Твоя, Дево, и поющия: благословен Бог отец наших.

Песнь 8.

Ирмос: Седмерицею печь,/ халдейский мучитель,/ богочестивым неистовно разжже,/ силою же лучшею спасены сия видево, Творцу и Избавителю вопияше:/ отроцы, благословите,/ священницы, воспойте,// людие, превозносите во вся веки.

Припев: Пресвятая Троице, Боже наш, слава Тебе.

Болезненно стенем, от одра болезни нашея, и от губительныя немощи, вопием к Тебе Человеколюбцу, сердечныя очи ныне простирающе, здравия просим. Посети нас, Спасе, и возстави пети: людие, превозносите во вся веки.

Припев: Пресвятая Троице, Боже наш, слава Тебе.

В нашу немощь милостивне облекийся, и уподобитися человеком изволивый, молитвами преподобных Твоих, отчаянных спаси нас, воздвигни из гроба отчаяния пети: отроцы, благословите, священницы, пойте, людие, превозносите во вся веки.

Слава: Содетелю естества, Подателю исцеления, утробы щедрот и благоутробия пучину яко имеяй, Долготерпеливе, посещением посети от губительных немощи люди Твоя и оживи вопити: священницы, воспойте, людие, превозносите во вся веки.

И ныне: Крепкая Помоще и известное Заступление, отчаявшихся Надежде, Пренепорочная, посети страждущия болезненно рабы Твоя, облегчи тяжесть горькия немощи, отжени недуг губительных нужди, и спаси рабы Твоя, Дево Богородице.

Песнь 9.

Ирмос: Ужасеся о сем небо,/ и земли удивишася концы,/ яко Бог явися человеком плотски,/ и чрево Твое бысть пространнейшее небес./ Тем Тя, Богородицу, // Ангелов и человек чиновначалия величают.

Припев: Пресвятая Троице, Боже наш, слава Тебе.

Чудеса велия, ихже несть числа, сотворивый Безсмертне, на рабы Твоя милости Твоя, Боже, яко Милостив покажи, и содержащая нас ныне свободи болезни, моленьми рождшия Тя, и лика страстотерпцев Твоих.

Припев: Пресвятая Троице, Боже наш, слава Тебе.

Ангелов, Архангелов и пророков, Апостолов, мучеников, преподобных же, иерархов, священномучеников Твоих молитвами, плач рабов Твоих обрати, Всесильне, в радость: исцели болезнь, облегчи недуги, и здравие нам даруй.

Слава: Душ же и телес Врача, в милости богатаго Господа Тебе молю: исцели страсти моя многия, болезней измени и скорбных мя, яко Благ и един Благодетель, и спасай верою чистою Тя величающих.

И ныне: Щедрого рождающая и Милостиваго, и Владыку, и Создателя, и Господа, и ныне на мне покажи Твоя обычно щедроты, и лютаго мя избави недуга, изнуряющего душу мою, Дево Богородице, и подаждь ми здравие, яко да непрестанно величаю Тя.

Лик (колена расставлены на восьмой глас): Достойно есть, яко воистинну/ блажити Тя, Богородицу,/ Присноблаженную и Пренепорочную,/ и Матерь Бога нашего./ Честнейшую Херувим/ и славнейшую без сравнения Серафим,/ без истления Бога Слова рождающую,// сущую Богородицу Тя величаем.

Чтец: Трисвятое по Отче наш.

Старший: Молитвами святых отец наших...

Лик: Аминь.

Лик поет покаянные тропари, глас 6:

Помилуй нас, Господи, помилуй нас:/ всякаго бо ответа недоумеюще,/ сию Ти молитву, яко Владыце, грешнии приносим:// помилуй нас.

Слава: Господи, помилуй нас,/ на Тя бо уповахом:/ не прогневайся на ны зело,/ ниже помяни беззаконий наших,/ но призри и ныне, яко Благоутробен,/ и избави ны от враг наших:/ Ты бо еси Бог наш,/ и мы людие Твои,/ вси дела руку Твоею,// и имя Твое призываем.

И ныне: Милосердия двери отверзи нам,/ Благословенная Богородице,/ надеющиеся на Тя, да не погибнем,/ но да избавимся Тобою от бед:/ Ты бо еси спасение// рода христианскаго.

Господи, помилуй (12 раз).

Старший: Молитвами святых отец наших...

Лик: Аминь. Господи Иисусе Христе, Сыне Божий, помилуй нас, грешных.

Старший читает молитву:

Господи Боже наш, призри с высоты святя Твоя на молитву нас грешных и недостойных рабов Твоих, беззаконными нашими Твою благодать

прогневавших, и благоутробие Твое раздраживших, и не вниди в суд с рабы Твоими, но отврати страшный гнев Твой, праведно на ны движимый, утоли губительное прещение, устави грозный Твой меч, невидимо безгодно секущий нас, и пощади нищих и убогих рабов Твоих, и не затвори в смерти души наша, в покаянии сокрушенных сердцем и со слезами к Тебе Милосердому, Благоуветливому, и Благоприменительному Богу нашему припадающих. Твое бо есть, еже миловати и спасати ны, Боже наш, и Тебе славу возсылаем, Отцу, и Сыну, и Святому Духу, ныне и присно, и во веки веков.

Лик: Аминь.

Честнейшую Херувим, и славнейшую без сравнения Серафим,/ без исления Бога Слова рождшую, сущую Богородицу Тя величаем./

Слава Отцу и Сыну и Святому Духу, и ныне и присно, и во веки веков. Аминь. / Господи, помилуй (трижды)./ Господи, благослови.

Старший творит отпуст: Господи Иисусе Христе, Сыне Божий, молитв ради Пречистыя Твоея Матере, святых славных всехвальных апостол, (**святые местночтимые и дня**), святых и праведных Богоотец Иоакима и Анны и всех святых, помилуй и спаси нас, яко Благ и Человеколюбец.

Лик: Аминь. Господи, помилуй (трижды).

Молебное пение во время губительного поветрия и смертоносной заразы (краткий чин)

Старший: Молитвами святых отец наших, Господи Иисусе Христе, Боже наш, помилуй нас.

Лик: Аминь.

Старший: Слава Тебе, Боже наш, слава Тебе.

Лик и все, кто присутствует: Царю Небесный,/ Утешителю, Душе истины,/ Иже везде сый/ и вся исполняяй,/ Сокровище благих/ и жизни Подателю,/ прииди и вселися в ны,/ и очисти ны от всякия скверны,// и спаси, Блаже, души наша.

Чтец: Трисвятое по Отче наш.

Старший: Молитвами святых отец наших...

Чтец: Аминь. Господи, помилуй (12 раз). Слава, и ныне. Приидите, поклонимся...

Псалом 37

Господи, да не яростию Твоею обличиши мене, ниже гневом Твоим накажеш мене. Яко стрелы Твоя унзоша во мне, и утвердил еси на мне руку Твою. Несть исцеления в плоти моей от лица гнева Твоего, несть мира в костях моих от лица грех моих. Яко беззакония моя превзыдоша главу мою, яко бремя тяжкое отяготеша на мне. Возмердеша и согниша раны моя от лица безумия моего. Пострадах и слякохся до конца, весь день сетуя хождах. Яко лядвия моя наполнишася поруганий, и несть исцеления в плоти моей. Озлоблен бых и смирихся до зела, рыках от воздыхания сердца моего. Господи, пред Тобою все желание мое, и воздыхание мое от Тебе не утаися. Сердце мое смятется, остави мя сила моя, и свет очию моею, и той несть со мною. Друзи мои и искреннии мои прямо мне приближишася, и сташа. И ближнии мои отдалече мене сташа, и нуждахуся ищущии душу мою: и ищущии злая мне глаголаху суетная, и льстивным весь день поучахуся. Аз же яко глух не слышах, и яко нем не отверзаяй уст своих, И бых яко человек не слышай, и не имый во устех своих обличения. Яко на Тя, Господи, уповах, Ты услышиши, Господи Боже мой. Яко рех: да не когда порадуют ми ся врази мои: и внегда подвижатися ногам моим, на мя велеречеваша. Яко аз на раны готов, и болезнь моя предо мною есть выну. Яко беззаконие мое аз возведу, и попекуся о гресе моем. Врази же мои живут, и укрепишася паче мене, и умножишася ненавидящии мя без правды. Воздающии ми злая воз благая оболгаху мя, зане гонях благостыню. Не остави мене, Господи Боже мой, не отступи от мене. Вонми в помощь мою, Господи спасения моего.

[Вместо данного богослужебного текста возможно чтение псалма 90:

Живый в помощи Вышняго, во дворех Бога Небеснаго водворится, речет Господеву: Заступник мой еси и Прибежище мое, Бог мой, и уповаю на Него. Яко Той избавит тя от сети ловчи и от словесе мятежна: Плещма Своима

осенит тя, и под криле Его надеешься: оружием обыдет тя истина Его. Не убоишия от страха ночнаго, от стрелы летящая во дни, от вещи во тьме преходящая, от сряща и беса полуденнаго. Падет от страны твоя тысяща, и тьма одесную тебе, к тебе же не приблизится: Обаче очима твоима смотриши, и воздаяние грешников узриши. Яко Ты, Господи, упование мое: Вышняго положил еси прибежище твое. Не приидет к тебе зло, и рана не приблизится телеси твоему: Яко Ангелом Своим заповесть о тебе, сохранити тя во всех путех твоих. На руках возмут тя, да не когда преткнеши о камень ногу твою: На аспида и василиска наступиши, и попереши льва и змия. Яко на Мя упова и избавлю и: покрыю и, яко позна имя Мое. Воззовет ко Мне, и услышу его: с ним есмь в скорби, изму его, и прославлю его: Долготою дней исполню его и явлю ему спасение Мое.]

Слава, и ныне. Аллилуиа, аллилуиа, аллилуиа, слава Тебе, Боже (трижды).

Лик: Господи, помилуй (12 раз).

Старший: Молитвами святых отец наших...

Лик: Аминь.

Старший: Бог Господь, и явися нам, благословен грядый во имя Господне.

(Стих 1:) Исповедайтеся Господеви, яко Благ, яко во веки милость Его.

Лик: Бог Господь... *(на второй глас)*

Стих 2: Обышедше обыдоша мя, и именем Господним противляхся им.

Лик: Бог Господь...

Стих 3: Не умру, но жив буду, и повем дела Господня.

Лик: Бог Господь...

Стих 4: Камень, егоже небрегоша зиждущии, сей бысть во главу угла: от Господа бысть сей, и есть дивен во очесех наших.

Лик: Бог Господь...

Тропарь, глас 2:

Во гневе Твоем, Боже, помяни щедроты Твоя,/ прах бо и пепел есмы,/ дух ходяй и не обращайся/, и не яростию Твоею обличи нас,/ да не погибнем до конца,/ но пощади души наша,// яко един Милосерд **(Дважды)**.

Слава Отцу и Сыну и Святому Духу.

Кондак, глас 6:

Болезни адовы обыдоша нас,/ и прикры ны сень смертная,/ и яко воск от огня,/ дние наши тают от лица гнева Твоего, Господи,/ но яко Щедр во гневе милости помяни,/ и пощади люди Твоя,/ да живи суще,/ в покаянии славим Тя// Единого Человеколюбца.

И ныне и присно, и во веки веков. Аминь.

Тропарь Богородице, глас 4:

Заступнице усердная,/ Мати Господа Вышняго,/ за всех молиши Сына Твоего Христа Бога нашего,/ и всем твориши спастися,/ в державный Твой покров прибегающим./ Всех нас заступи, о Госпоже Царице и Владычице,/ иже в напастех и в скорбех и в болезнях обремененных грехи многими,/ предстоящих и молящихся Тебе умиленною душою/ и сокрушенным сердцем/ пред Пречистым Твоим образом со слезами,/ и невозвратно надежду имущих на Тя,/ избавления всех зол,/ всем полезная даруй/ и вся спаси, Богородице Дево:// Ты бо еси Божественный покров рабом Твоим.

Чтец: Прокимен, глас 4: Господи, да не яростию Твоею обличиши мене, ниже гневом Твоим накажеш мене.

Лик: Господи, да не яростию Твоею обличиши мене, ниже гневом Твоим накажеш мене.

Чтец (стих): Яко стрелы Твоя унзоша во мне, и утвердил еси на мне руку Твою.

Лик: Господи, да не яростию Твоею обличиши мене, ниже гневом Твоим накажеш мене.

Чтец: Господи, да не яростию Твоею обличиши мене.

Лик: Ниже гневом Твоим накажеш мене.

Чтец: Ко Евреем послания святого апостола Павла чтение.

Братие, егоже любит Господь, наказует: биет же всякаго сына, егоже приемлет. Аще наказание терпите, якоже сыновом обретается вам Бог. Который бо есть сын, егоже не наказует отец; Аще же без наказания есте, емуже причастницы быша вси, убо прелюбодейчищи есте, а не сынове. К сим, плоти нашей отца имехом наказатели, и срамляхомся: не много ли паче повинемся Отцу духовом, и живи будем; Они бо в мало дней, якоже годе им бе, наказоваху нас, а Сей на пользу, да причастимся святыни Его. Всякое бо наказание в настоящее время не мнится радость быти, но печаль: последи же плод мирен наученым тем воздает правды. Темже ослабленныя руки, и ослабленная колена исправите. И стези правы сотворите ногами вашими: да не хромое совратится, но паче да исцелет (**Зачало 331 от полу**).

Аллилуиа, Аллилуиа, Аллилуиа.

Лик: Аллилуиа, Аллилуиа, Аллилуиа.

Чтец (стих 1): Одержаша мя болезни смертныя, и потоцы беззакония смятоша мя.

Лик: Аллилуиа, Аллилуиа, Аллилуиа.

Чтец (стих 2): Болезни адовы обыдоша мя, предвариша мя сети смертныя.

Лик: Аллилуиа, Аллилуиа, Аллилуиа.

Старший: От Луки Святого Евангелия чтение.

Лик: Слава Тебе, Господи, слава Тебе.

Старший: Во время оно, вниде Иисус в дом Симонов, теща же Симонова бе одержима огнем велиим, и молиша Его о ней. И став над нею, запрети огню, и остави ю: абие же воставши служаше им. Заходящу же солнцу, вси елицы имеяху болящия недуги различными, привождаху их к Нему: Он же на едином коегождо их руце возлож, исцеляше их. Исхождаху же и беси от многих, вопиюще и глаголюще: яко Ты еси Христос Сын Божий. И запрещая не даяше им глаголати, яко ведяху Христа Самого суца. Бывшу же дни изшед иде в

пусто место: и народи искаху Его, и приидоша до Него, и держяхуся Его, да не бы отшел от них. Он же рече к ним: яко и другим градовом благовестити Ми подобает Царствие Божие, яко на се послан есмь. И бе проповедая на сонмищах Галилейских **(Зачало 16)**.

Лик: Слава Тебе, Господи, слава Тебе. Господи, помилуй (12 раз).

Старший: Молитвами святых отец наших...

Лик: Аминь. Господи Иисусе Христе, Сыне Божий, помилуй нас, грешных.

Старший читает молитву:

Господи Боже наш, призри с высоты святяя Твоя на молитву нас грешных и недостойных рабов Твоих, беззаконьми нашими Твою благодать прогневавших, и благоутробие Твое раздраживших, и не вниди в суд с рабы Твоими, но отврати страшный гнев Твой, праведно на ны движимый, утоли губительное прещение, остави грозный Твой меч, невидимо безгодно секущий нас, и пощади нищих и убогих рабов Твоих, и не затвори в смерти души наша, в покаянии сокрушенных сердцем и со слезами к Тебе Милосердому, Благоуветливому, и Благоприменительному Богу нашему припадающих. Твое бо есть, еже миловати и спасати ны, Боже наш, и Тебе славу возсылаем, Отцу, и Сыну, и Святому Духу, ныне и присно, и во веки веков.

Лик: Аминь.

Честнейшую Херувим, и славнейшую без сравнения Серафим, без истления Бога Слова рождшую, сущую Богородицу Тя величаем.

Слава Отцу и Сыну и Святому Духу, и ныне и присно, и во веки веков.

Аминь. Господи, помилуй (трижды). Господи, благослови.

Старший творит отпуст: Господи Иисусе Христе, Сыне Божий, молитв ради Пречистяя Твоя Матере, святых славных всехвальных апостол, **(святые местночтимые и дня)**, святых и праведных Богоотец Иоакима и Анны и всех святых, помилуй и спаси нас, яко Благ и Человеколюбец.

Лик: Аминь. Господи, помилуй (трижды).